

فريق التفريغ بموقع الطريق إلى الله

يقدم

من سلسلة "أسرار العشر"

أسرار الذكر

(باللهجة المصرية)



لفضيلة الشيخ: حازم شومان

رابط المادة: <http://way2allah.com/khotab-item-80736.htm>

بسم الله والصلاة والسلام على رسول الله، الحمد لله وكفي والصلاة والسلام على عباده الذين اصطفى.
أسرار الذكر.. أسرار هذه العبادة العظيمة:

١- الذكر ده رسالة حب منك لربنا - سبحانه وتعالى -

رسالة حب ازاي؟ يا جماعة أقف أو أقفي في الشارع هتلاقي كل الناس بتتكلم عن أي حاجة إلا عن ربنا دول بيتكلموا عن الفلوس ودول عن الشهوات ودول بيتكلموا عن الشهادة ودول بيتكلموا عن الامتحان وانت ماشي بتتكلم عن ربنا، وأنتي ماشيه بتذكري ربنا.. دي رسالة حب. لما واحد يقول لحبيبه وهو في دولة تانية أنا على طول في سيرتك.. شوف ده بيفرّح حبيبه قد إيه؟! من أسرار الذكر إنه رسالة حب منك لربنا.

٢- عبادة المتفردين من البشر هم بس اللي دايمًا على لسانهم ذكر ربنا - سبحانه وتعالى -.

عشان كده الرسول -صلى الله عليه وسلم- يقول "سبق المُفَرِّدُونَ قَالُوا: وما المُفَرِّدُونَ يا رسول الله؟! قال
الذَّاكِرُونَ الله كثيرًا، والذَّاكِرَات" صحيح مسلم

٣- الذكر يعرفك إنت غالي عند ربنا أد إيه وانتِ غالية عند ربنا أد إيه

"سبحان الله" من لسانك ربنا يدريك بيها أد جبل أحد، "الحمد لله" من لسانك ربنا يدريك بيها أكثر من جبل أحد، "الله أكبر" من لسانك ربنا يدريك بيها أكثر من جبل أحد.. ليه؟
يبقى انتِ غالية عند ربنا ويبقى انت ليك قيمة عند ربنا، عشان كده الذكر بيعلمك اوعى تنزل نفسك ويعرفك عمرك غالي أد إيه؟، ووقتك غالي أد إيه؟، إن الدقيقة بصفقة، أنا كان ليّ واحد صاحبي من الناس اللي كانت معنا في الكلية شغال في العقارات يقول لي: النهارده أنا خسرت ١٠ آلاف جنيه، بأقول له ليه: قال لي: أنا اشتريت شقة بـ ١٠٠ ألف وبعته بـ ١٥٠ ألف، قلت له: طيب ما انت كده كسبت، قال لي: لأ أنا كان ممكن أبيعها بـ ١٦٠ ألف جنيه.

٤- الذكر بيخليك تندم على عمرك اللي فات

ويعرفك قيمة كل دقيقة وكل ثانية.

٥- من أسرار الذكر إنه بيملك حياة

لأنه حياة الذكر حياة يا جماعة لأن كل لحظة تبقى بحسنات وكل دقيقة تبقى بحسنات.

٦- من أسرار الذكر إن اسم العبادة "الذكر" وليس التذکر

التذکر معناها إن أنا ناسيك يا ربي وهأفتكرک! أما الذکر فهو كلام الحبيب عن الحبيب، يعني اسم العبادة نفسه معناه إن اللي بيتكلم ده بيحب اللي بيتكلم عنه.

٧- ومن أسرار الذكر إن اللسان أخطر عضو في الجسم كله

العضو ده لو ماشغلتوش في العبادة الخطيرة دي هيضيّعك، علشان كده من أسرار الذكر إنه من أعظم أسباب حب ربنا.. ازاي؟ ازاي الذكر يخليك تحب ربنا مش إن ربنا يحبك بس.. إن انت تحب ربنا. هي الناس حبت الدنيا ليه؟ لأنهم اتكلموا عن الدنيا واتكلموا عن الدنيا وحبوا الدنيا من كتر ما اتكلموا عن الدنيا والسيارات وعن وعن..

طيب احنا بنتكلم عنك يا رب هنذكرك يا رب لحد ما قلوبنا تمتلئ بحبك، الذكر سر عظيم بين العبد وبين ربنا، اوعى السر ده ما يقاش موجود في حياتك، اوعى السر ده ما يقاش بينك وبين ربنا، لأنه هيخسر كثير قوي اللي السر ده مش هيبقى بينه وبين ربنا.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله تفضلوا هنا:

<http://forums.way2allah.com/forumdisplay.php?f=36>